



Morfelden

Herbesspruch 1992

Er liewe Leit, es ess so weit
in Worfelle ess wirrer Kerwezeit.
Woanns iwveroal noch Quetschekuche rischt,
unn hoch die Sunn vum Himmel schtischt.
Woann die Wisse all gemeht,
un hie un do noch en Maisacker steht.
Do kumme mer Kerweborsch wirrer aus de Ecke,
unn dunn schunn Woche vorher die Leit noacht's wecke,
weil maschiern geiebt muß wern,
aa woann die Leit aus de Fenster plärn.
Dess macht uns awwer wenisch aus,
do losse mer trotzdem die Sau eraus.
Vier doach loang werd de Alldoag vergesse,
do werd halt emol rischdisch ess Maul uffgeresse.
Aa Däsjoor honn mer uns gut vorbereitet'
unn dess alles nur ver Eisch ehr Leit.
Schon vor Woche honn mer uns getroffe,
unn iwwer hunnert Laddernscher gesoffe.
Weil dodefer soin mer Kerweborsch jo do
bei uns zische die Humbe wies Wasser im Klo.
Unn woann de Kerwevadder es Maul uffreist un rift,
so daß er alle oannern iwwertrifft,
do soin die Kerweborsch erst rischdisch froh
un singe: "Die Worfeller Kerb es wirrer do!"

Es Wasser werd knapper vun Joor zu Joor,
do kimmt es doann aa schunn emol vor,
daß mer uns geheerisch euschräge misse,
un des ned nur beim Drigge noch em' Pisse.
Unn wer, woss in unsere Gärde so sprießt,
a donn noch mid de Gießkoann gießt,
der werd bestrooft, mer glaabt es koum,
zejedausend Makk, es ess koan Troum.
Unn stellt eisch vor die Brieh werd so knabb,
die stelle uns Middoags es Wasser oab,
ich glaab dess det uns goanz schee fehle,
isch will eisch mol oan Fall verzehle.
Ess hot sich oaner, woas ess er gewetzt,
middoags um drei uff de Aabee gesetzt.
Er denkt net dro, daß koa Wasser meh do
er drickt oaner oab, soin Kopp es schunn bloo,
ich wills eisch net soue, was er hot gedoacht,
als die Schbielung iwwerhapt koan Mucks hott gemoacht,
er rennt doann enunner, es ess net geloue,
in de Keller unn hot e paar Bier uffgezoue,
er schbielts mit drei goanze Flasche enunner,
mit dem Rest ertränkt er seun riesische Kummer.
Unn es Enn vum Lied, säht ehr dess eu,
ohne Bier derf halt enn Moann net seu.
Unn die Mussig speelt, es ess net dumm,
"Bier her, Bier her, orrer isch fall um"

Es war en Owend in de Dutt, un die war voll,
do hoat sich woas ereignet, ehr leit war dess doll.
Mer hot mit e paar Moann oam Disch gehockt,
un wie immer Bauerschers gezoggt.
Beim Schbeelmoannszuch war die Iwungsstunn groad aus,
drum war beim Dutte Rolf "vull house".
Die Plätz war'n eng die Stimmung war groß,
sogar die Silke hockt beim Trotte Harry uffem Schooß.
De oa hot em onnern woas vorgeloe,
un oan de Thek honn die Bauern iwwer sich hergezoue.
Nadierlich hot mer nur disgudiert, ess gab aa koan Streit,
es warn alles bekamnte Worfeller, un nur trinkfeste Leit.
Uff oamol hot's Telefon gebimmelt, un die Rund war korz unner- broche unn de
Herr Engel hot erstemol mit soiner Fraa geschproche.

Die seegt zu ihm: " Woas soin en dess fer Bosse,
du kennst Dich emol wirrer blicke losse.
Mach bloß un kumm aus de Dutt eraus,
sunnst grieg ich noch de große Grauß."

Do seegt de Herbert, un ess fällt em sichtbar schwer,
"noch 10 Minute, ich trink groud moi Bier noch leer."
Ab geht's wirrer on die Thek un weirrer geschwätzt,
un so loangsom donn es Bier oabgepetzt.
Er groad de bei de letzte Schluck oabzubumbe,
Do segt de Eunemers Schorsch, isch loss misch net lumbe.
un stellt em noch e Pungschter Pilsje hie,
do guckt de Herbert uff die herrlich Brie.
Er wollt zwar hoam, doch denkt er, "Als weirrer,
do muß die Fraa halt waade, leirrer."
Während de Herbert noch genussvoll oan soim Biersche nippt,
guckt de Schuster Gerhardt uff die Gass un kreischt "Ei isch werr verrickt!".
"Kupsch deu Klarrer flije vum Himmel uff die Gass,
mer kennt moane deu Fraa die hot Brass."
De Kupsch nimmt dess noch gar net fer woahr,
bis die Schbelmoannsklamotte falle, doan war er wirre kloor.
De Gerhardt lacht un segt, "Ach lieber Gott,
ess ess net zu glawe wos der Kupsch fer en houfe Klamotte hot."
All hoan'se nur gelacht, es war schon en Schmuuh,
Bloß oan Monn der hot koa Ruh,
Vumm Vochelschutz de Alfred Lager,
der war in der Siduazion goanz schee wacker,
denn in Sache Nadur kennt der sich aus,
un moant, "Do schmeißt en Adler groad seu Nest enaus."
Doch als Helfernatur hots de Alfred erkennt,
un nimmt de Herbert oan die Hond,
un tregt mit ihm die Wesch zurick ins Haus,
die goanze Leit hoann gedenkt wie geht dess jetzt bloß aus.
Doch alles ging gut, De Alfred hot de Streit auskuriert,
so daß die Ehe noch heit funktzioniert.
Drum lieber Herbert mach der nix draus,
denn moanscher Ehekrach ging schon oannerscht aus.

Kamerad schenck eu e Gläsje Woi ess muß emol getrunke soi.

Bei uns in de Gejend war enn Laster umgeschmesse,
 der hat Torns Schuh geloare, unn nix zum fresse,
 mer hot doann geheert, mer konnts gar net glaawe,
 in de Broucht gibts billische Torns Schuh zu kaafe.
 Es gibt oan im Ort, der ess defeer bekoannt,
 daß er Geld macht mit allem, woas er ziehe koann oan Loand,
 er fährt in die Broucht, kaaft Torns Schuh billisch oi,
 unn verkaaft se beim Opel, woas ess dess so foi.
 Die Opeler reiße sich um die billische Schlabbe,
 unn freje sich, wie des mit dem Preis konnt klabbe,
 doch er sitzt nur hinner soim Schreibtisch unn segt,
 mer muß halt wisse, wie Geld mache geht.
 Die Torns Schuh war er all baal los,
 de Preisvorteil, der war halt groß.
 Doch halt, des war noch net genuch,
 ess geht noch weirer, Zuch um Zuch.
 E Woche-enn-Auto vum Opel ess schee,
 weil mit dem fährt mer billisch iwverall hee,
 wo mer mit em ajene net heefahrn mecht,
 weil de Sprit ess so deier, unn des ess halt schlecht.
 Er hat so e Auto iwwers Wocheenn dehoam,
 unn muß nadirlich Killometer fahrn
 er denkt sich doann, des ess koan Bluff,
 "Ich fahrn emol oan die See enuff",
 Zwaa Zentner Schbaschel in de Kombi geloare,
 unn ab oan die Nordsee, die Fisch dunn schunn waade.
 Freidoags gehts he unn Sunndoags hoam,
 de Motor, der bleibt immer warm,
 unn als er hoamkimmmt, woas e gekrisch,
 de goanze Kofferraum voller Fisch.
 Do rifft soi Fraa, Moann, muß des soi,
 wo frier ich doann die Fisch jetzt oi,
 ich hob jo koa Wordde, du bist mer en Bleere,
 e zweit Gefriertruh ess jetzt vunneere,
 awwer macht nix, jetzt gibts halt ess ganz Johr nur Fisch,
 dodeföh nimmt mer oab, des ess gut fer dich.
 Unn die Mussigg speelt, des geheert halt do her,
 de Milchmoann mit dem Lied:

WENN ICH EINMAL REICH WÄR!!!!!!!!!!!!!!!!!!!!

Isch merk gradäwe die Käähnl werd mer wund,
 doch do geht's bei uns erst rischdisch rund,
 Isch load Eisch all goanz herzlich eu,
 nur oamol im Johr gibt's Kerwewoi,
 losst emol die Wutz eraus dess ess gesund,
 Feiert Eisch eckisch un wirrer rund,
 unn seid zum Friehschobbe wirrer do,
 ob nischdern orrer noch e bisje bloo,
 do werd wirrer uff de Gass rumgedollt,
 unn Midoags donn die Bierfässer gerollt.
 Meer wernn fer Unnerhaltung seuje,
 Heit un a nadierlich meuje.
 Aa de Dieter lāsst sich net lumbe,
 unn bringt mer jetzt noch schnell en Humbe.
 Nur noch oan Satz eh isch her uff,
 Schtabfiehrrer de Kerwemarsch jetzt druff,
 Unn jeder singt mit jetzt un ess rischdisch froh
 "Die Worfeller Kerb ess wirrer do!"